

Potvrđena optužnica protiv zaposlenika Vlade TK-a

IMAMOVIĆ OD TUZLA-KVARCA TRAŽIO 30 HILJADA KM

• Primio mito kako bi firmi bila dodijeljena koncesija za eksploataciju pijeska • Nakon Imamovića, uhapšen i zamjenik direktora Tuzla-kvarca, koji je saradivao sa SIPA

Općinski sud Tuzla potvrdio je optužnicu Tužilaštva Tuzlanskog kantona protiv Bahira Imamovića iz Gračanice, zbog postojanja osnovane sumnje da je kao pomoćnik ministra industrije, energetike i rudarstva u Vladi TK-a počinio krivično djelo primanje dara ili drugih oblika koristi.

Tri rate

U optužnici je navedeno da postoji osnovana sumnja da je Imamović, dok je obavljao pomenutu funkciju, u čijoj nadležnosti je procedura dodjele koncesija za eksploataciju mineralnih sirovina na području TK-a, u periodu od početka aprila do 7. maja ove godine, od zamjenika direktora firme Tuzla-kvarc tražio novac kako bi olakšao proceduru dobijanja koncesije za eksploataciju pijeska sa jednog tuzlanskog nalazišta. Tuzla-kvarc je već ranije podnio zahtjev za dodjelu koncesije za eksploataciju kvarcnog pijeska na tri lokaliteta u blizini Tuzle.

- U optužnici je navedeno da je Imamović od zamjenika direktora Tuzla-kvarca, za proceduru dodjele koncesije na ležištima kvarcnog pijeska, tražio da mu se u tri rate isplati dar od 30 hiljada. Obećavajući provedbu prvog dijela procedure dodjele koncesije, od odgovornog lica ove firme primio je 10 hiljada KM, kazao je Admir Arnautović, portparol Kantonalnog tužilaštva.

Povučena odluka

Imamović je uhapšen 7. maja 2015. godine, u akciji koju je proveo Tužilaštvo BiH u saradnji sa Agencijom za istrage i zaštitu BiH (SIPA), a uz naredbe koje je izdao Sud BiH. Hapšenje Imamovića pomogao je i Smajil Velagić, zamjenik direktora Tuzla-kvarca, koji je kao saradnik državne Agencije za istrage i zaštitu pomogao državnom Tužilaštvu da uhvate Imamovića u momentu primanja mita.

Neposredno nakon hapšenja Imamovića, Vlada TK-a donijela

je odluku o davanju koncesije na petogodišnji izvoz kvarcnog pijeska sa ležišta u tuzlanskom naselju Bukinje firmi Tuzla-kvarc, koja je Ministarstvu industrije TK-a kao koncesionaru trebala platiti jednokratnu koncesionu naknadu u iznosu od 18 hiljada KM na rate u toku naredne godine, te će za svaki izvezeni kubik pijeska morati dodatno platiti 60 feninga. Međutim,



Imamović prilikom privođenja



istog dana kada je donesena ova odluka, uhapšen je i Velagić, uz optužbu da je izvezeći pijesak bez ugovora, oštetio Kanton za četvrt miliona KM, te je odluka o koncesiji povučena.

U predmetu protiv Bahira Imamovića ročište za izjašnjenje o krivici zakazano je za 30. avgust pred Općinskim sudom u Tuzli, dok će se Velagić o krivici izjašnjavati 20. avgusta u istom sudu. **M. ALJIĆ**